

全
浙
詩
話

全浙詩話卷三十三

會稽陶元藻篁村輯

男

廷珍

廷淑

編次

仁和朱文藻映澹

參訂

同邑宗聖垣芥颿

明

葉良佩

良佩字敬之號海峯太平人嘉靖癸未進士官

刑部郎中

三台詩錄

海峯常授新城令以空庭不掃二分雪秦

字長留一脈春一語自署其門調貴溪陞刑部郎中原
本律意著刑法論兩篇緣與况伯師講學忌者羅織其
罪劾奏落職歸林下著述甚富詩以少陵爲法兼出入
太白東坡宗仰旣高而學識才情又足以副之蓋嘉靖
初年鄉郡一大作手也海峯被放歸有句云遭際祇
應慚犬馬放歸真得食鱸魚時人誦之

張時徹

時徹字雅靜鄞人嘉靖癸未進士授兵部主事
累官至兵部尚書有芝園集

靜志居詩話 芝園樂府不規摹古人較之濟南覺勝

五律頌近初唐七律疎爽無譏焉已

凌 瀚 唐 鉞

瀚字德容蘭溪人嘉靖四年鄉舉授泰寧教諭
終周府紀善有巖亭太寧大梁諸稿

鉞字君錫蘭溪人嘉靖十年鄉舉授栗陽令遷

揚州府同知

金華詩錄

唐鉞宮詞評

凌紀善宮怨云多情莫怨君恩薄

三十六宮輦路通爲平情之語此云靜裏菱花開自照
敢將顏色怨君王作反己之詞皆發前人所未發

施 侃

侃字邦直歸安人嘉靖丙戌進士有菁山集

嘉靖湖州府志 侃肆力於學經史之餘凡陰陽律呂
兵卜奇秘無不鉤勘有得輒書於冊爲古文雄渾深懋
詩先氣格意興清遠與山人孫太初游其詩才亦畧相
當

錢 鎮

鎮字守中烏程人嘉靖進士官兵部郎中有淡
庵集

青瑤詩話 許孟中稱淡庵詩冲逸似陶韋其新晴散
步詩云新篁拔地已數尺黃鳥隔林時一聲出句不如

對句情景兼到神韻悠然

屠應竣

應竣字文升平湖人嘉靖丙戌進士選庶吉士
改刑部主事調禮部歷員外郎中仍改翰林修
撰歷侍讀進春坊右諭德有蘭暉堂集

靜志居詩話 諭德取材六代具體初唐爛若春葩將
以秋實是衆作之有滋味者

陸銓

銓字選之鄞人嘉靖癸未進士除刑部主事諫
大禮廷杖歷兵部員外郎禮部郎中出爲福建

按察副使歷廣西按察使廣東布政使有石谿

集

靜志居詩話 石谿論詩專以性情爲主嘗曰宋人不能爲唐唐人不能爲漢魏時爲之也其偶似者宋之似唐唐之似漢魏耳故諸體不沿時習五言如鳥白雲中樹山青雨後峯亂帆爭入浦羸馬怯過橋越竹成遊轎吳蠶吐釣絲七言如山田雨足秋仍熱石室風高夏亦寒絕壁有松人不到深林無主鳥相忘沙頭水急潮初落山腹烟多雨未收野樹巢空驚鶴去淺沙舡動覺潮來輕便度嶺雙肩轎小巧穿橋獨櫓舟一別動經千里

濶百年消得幾回忙皆非陳言也至若獄中次季舉之韻云聖怒不妨爲孝子狂言豈敢托忠臣庶幾哉忠厚之遺矣

菊坡詩話 詩以細膩熨貼爲工嘗讀石溪輕便度嶺雙肩輪小巧穿橋獨櫓舟一別動經千里濶百年消得幾回忙可足當四字矣然此乃宋人妙境唐人不能爲也

范言

言字孔嘉秀水人嘉靖丙戌進士官至大理府同知有菁陽集四聲存稿

靜志居詩話 菁山先生不畏強禦爲國子監丞時嚴
世蕃著紅袴入上舍先生夏楚撻之分宜次日造門謝
未幾而大理丞命下矣嘉靖初吾鄉稱詩必以先生爲
巨擘屠諭德漸山長歌云菁山先生真崛奇文章垂世
光陸離懸黎結綠世莫識陽春白雪和者稀是時漸山
詩名藉甚顧入室稱弟子焉

石文睿

文睿字文思寧海人嘉靖丙戌進士除太常博
士有白山集

靜志居詩話

文思詩未成家然如寒生紅葉雨秋老

白蘋江高塔靜觀塵土界老僧閒數廢興年正是不俗
聞人銓

銓字邦正餘姚人嘉靖丙戌進士知寶應縣擢
山西道御史巡視兩關歷湖廣按察副使有芷
蘭集

靜志居詩話 邦正著錄陽明之門撰欽射圖解又雕
劉煦舊唐書行世津津好古不易得也句如花落雨餘
雨風吹寒日寒情味不淺

邵 濬

濬字懷原又字一元太平人嘉靖戊子鄉科官

德府長史

三台詩錄 一元常輯古賢王行事名訓志錄王嘉納之假歸王賜詩曰春日凝裝駕紫駟長亭柳色不勝愁咨卿拜掃宜還早莫待寒風涉九秋其相得如此所傳有陳伯玉杜少陵詩註

蔡雲程

雲程字亨之號鶴田臨海人嘉靖己丑進士官至刑部尚書著有鶴田集

三台詩錄 尚書夢登黃鶴樓有作覺記領聯足成之云丹梯雄跨楚城頭野客中宵憶夢游江到望窮天作

岸鶴隨仙去地餘樓寒蘆斷雁牽秋思短笛斜陽入暮
秋爲想風流禰處士不堪惆悵白蘋洲故是豪壯之作
領聯屬對妙於不板郡志載尚書十歲侍父督學湖湘
過黃鶴樓題詩云云一時傳誦卽夢中所記句也當以
本集爲正

陳東

東字約之鄞人嘉靖己丑進士選庶吉士改禮
部主事己復改編修後仕至河南提學副使有
后岡集

明詩綜

王元美云陳約之如青樓小女月下空篋初

取閒適終成淒楚又如過雨殘荷雖爾衰落嫣然有態
曾 銑

銑號石塘江都籍本黃巖人嘉靖己丑進士累
官兵部侍郎三邊總制

三台詩錄 石塘爲巖嵩仇鸞構陷論斬臨刑有句云
袁公本爲百年計晁錯翻罹七國危聞者莫不冤之隆
慶時追贈尚書諡襄愍

祖 晟

晟字廷昭海鹽人嘉靖辛卯貢士司訓宿州歸
林下二十餘年乃卒

攜李詩繫 祖晟性耽吟咏得句秀拔如碧山吏隱尋
松子丹井仙方浸木奴人慕荊州求識面誰逢東野不
低頭有東歸稿

馮汝弼

汝弼字惟良平湖人嘉靖壬辰進士工科給事
中以言事謫潛山丞遷知太倉州調揚州府同
知不赴隆慶初追贈布政司參政有祐山集

祐山雜說 余居京師時同年錢海石數乘月過余引
滿高吟余賡一絕云明月在地人在天塵塵玉宇遙相
連高歌不問南來鶴猶恐人知是謫仙未幾果謫人以

爲詩讖云

蔡汝楠

汝楠字子木德清人嘉靖壬辰進士仕至南京工部侍郎有自知堂集又有白石山人詩選行於世

靜志居詩話 侯舜舉云白石詩諸體皆合五言類陸機沈約易者擬子昂七言近體與盛唐諸公相軋而七言故多似高岑五言近體多似王孟黃清浦云子木登第最早服官留都與皇甫伯仲日相唱和雅有令譽送別登臨佳句未嘗不在人口也旣而官爵日尊詩格日

損必窮乃工豈其然耶

湖州府志 白石弱冠卽以詩聞初學六朝旣而學劉長卿又學陶韋唐應德謂其脫盡鉛華獨存本質幽閒雅淡一變而得古作者之精

孫陞

陞字志高餘姚人嘉靖乙未進士第二授翰林編修仕至南京禮部尚書贈太子少保諡文恪有集

柳亭詩話 湘湖所產楊梅與洞庭山爭勝餘姚竹溪亦稱佳品孫文恪詩萬壑楊梅絢紫霞燭湖佳品更堪

誇自從名繫金閨籍每歲嘗時不在家文恪名陞字志高忠烈公季子歷官禮部尚書

駱文盛

文盛字質甫武康人嘉靖乙未進士改庶吉士授編修

分省人物考 文盛乞病還終不起溪居惟詩酒自娛其用意深遠蓋有託而逃者蔡白日稱其詩冲淡爾雅摘句整秀孫文恪稱其文簡古多思尤深於詩婉切冲雅似唐人有遺稿十二卷雜文二卷

施峻

峻字平叔歸安人嘉靖乙未進士歷官南刑部
主事遷郎中出知青州有璉川詩集

湖州府志 峻有璉川詩集八卷時推其七言今體謂
可方唐唐應德云家居樓榭如斗典籍甚具署曰甲秀
非同調不與登歌詩歡飲以終其身

沈鍊

鍊字純甫一字子剛號青霞會稽人嘉靖戊戌
進士知溧陽縣調荏平再知清豐入爲錦衣衛
經歷劾嚴嵩廷杖謫保安尋爲嵩所陷僇於邊
隆慶初贈光祿寺少卿諡忠愍有鳴劍集

金華詩錄

少君

吳儒子

遊櫺李嘗至海鹽客錢懋穀家

懋穀爲刻詩集姚士麟叔祥爲作遺事謂在錢氏別館
適膺月祀竈以手摩銅竈曰銅竈銅竈聽吾祭告雖煮
薇蕨但燒枯槁有粟必義酌水亦笑人皆欲清汝獨絜
曜庶不辱命且供衰老篋中藏一劍言得形神經秘法
於庚辰歲七月庚申作西向竈以竹炭冶鍊往往能出
光怪間出示人有以綠萼梅杖名曰紫玉又有一紅斑
竹杖上有鳩頭形製甚古好事者購之不得吾鄉沈純
甫贈之詩云食無魚處寧彈鋏杖有鳩時不換錢少君
見詩曰沈公知我生平稱人所贈詩以京口陳從訓僻

意少人會好懷多自憐爲第一

明詩綜 王元美云青霞詩甚奇麗而不能盡削其牢騷憤激之氣故往往多楚聲

柳亭詩話 沈忠愍謫置保安痛憤權奸束梟三像盧杞秦檜嚴嵩而射之作射虎行會嵩黨楊順巡撫宣大以口外居民截馘獻功忠愍作詩曰殺生獻馘古今無解道功成萬骨枯百草黃沙風雨夜冤魂多少覓頭顱順聞之嗷分宜竄公名於白蓮教論死後邀卹與楊應山同謚蓋取危身奉上在國逢難之義云公名鍊字純甫號青霞會稽人

按鍊旣置保安適揚順匿敗以捷聞得賞方宴會諸
僚稱賀鍊以詩大書遺順順大銜之而邊人慕鍊忠
義多附之者鍊乃招流亡設城守爲禦邊計敵聞鍊
兵輒相戒勿近於是順與嵩謀謂鍊將爲亂鍊遂被
刑并戍其子襄隆慶初詔贈鍊光祿少卿錄其子襄
襄上堂訟父冤順坐死越五年臺使令有司祠祀之
鍊所著書悉亡於被
逮時今僅存青霞集

應 鑣

鑣字聲甫臨海人嘉靖丁酉鄉科官同知

三台詩錄

聲甫題仙巖文丞相祠云千載淒涼說景

炎誰將遺恨托啼鵑真州夢斷三更月淮海帆回一旅
烟自信立君猶有後那知行地總無前先生欲了綱常
担不管人間泣逝川信國鎮江旣脫難至真州欲依李

庭芝李疑之乃趨高郵通州渡海至台州舟泊仙巖頷
聯使事切貼結句指後人憑弔者言

查秉彛

秉彛字惟甫海寧人嘉靖戊戌進士累官至順
天府尹有覺菴存稿

柳亭詩話 海寧查秉彛爲諸生時夢入一暗室被杖
額懸天上春回四字後爲給事中劾嚴嵩父子廷杖六
十謫定邊典史追憶前夢因有句云九重天上春回日
二十年前夢裏身可見世間榮辱俱有定數而人邀榮
避辱如脂如韋以期倖免者何哉

吳維嶽

維嶽字峻伯孝豐人嘉靖戊戌進士仕至右僉
都御史貴州巡撫有天目山齋歲編

靜志居詩話 峻伯如鉛刀土花不堪灑削然其五律
頗如岑嘉州張司業風格句如關河春雁少風雨暮鐘
多細雨來因晚空山到已秋清颼涼帶葉零雨細沾沙
亂水穿林響殘星綴嶺低翳藤舒柏葉芟草出瓜苗暮
雨初收市秋江正長潮潮生風聽急江遠雨看無澗水
斜牽篋林烟遠出邨沙頭飛燕子市上賣櫻桃鐘殘寒
雨外雁沒遠烟中較之明卿子輿輩故自勝之

趙錦

錦字元機餘姚人嘉靖甲辰進士

吳越所見書畫錄 宋末文信國手札卷嘉靖庚申上
虞徐學詩龍川跋云錢塘瞿子吉夫偕舍姪爲梁讀書
稽山院中一日從予遊西湖上出其先世所藏宋文山
公遺墨示予簡首殘缺不知其幾今可讀者凡九項每
項各書一事一峯羅先生爲公跋語意在空坑兵敗後
寄其所知者之書也中間稱柳環二娘者乃係公女流
落軍中托伊物色周都統者乃公愛將死於瑞金云云
姚江趙錦題詩云萬死驅馳志未休一航南泛欲何求

興亡過眼俱陳迹遺翰驚看世獨留

王 鈞

鈴字九難黃巖人嘉靖甲辰進士累官至山東
按察僉事

三台詩錄 九難嘗有大水謠云八月潮逢秋水霑釀
爲洪水成陸沈天風驅濤撼床足枕邊似聞蛟龍吟水
勢逼床漸近虜呼兒抱衾吾安徂吾廬亢爽尚如此江
邊茅屋將安乎更憐浥遍登場粟四野吞聲天何辜病
夫拍床聊苦吟地遠天高誰與蘇黃巖西城福佑廟祀
唐尚書右丞王維俗呼王總帥靈異甚著嘉靖中忽降

此爲詩與邑中士大夫唱和聯句此九難與孫山人少
梅同作以呈神乞和者也神有和作云風橫瀚海鯨波
雷亂龍聲動烏雲沈茫茫四野燒烟滅草堂驚我聯床
吟吁嗟斯民艱剝膚褰裳北走還西徂禾麥登場盡湮
沒盛世豈宜如此乎掀茅三重猶自可飄戶四出眞無
辜誰爲飛章奏天闕詔銜丹鳳民重蘇按神與杜工部
同時掀茅三重用杜語似非神作然全首工穩清勁亦
非凡手所能贗也九難更有仰高篇亦呈神者

李有朋

有朋字彥孚東陽人嘉靖二十五年鄉舉由縣

令遷判岳州再遷魯府長史有輿中懷沙等集

金華詩錄

李有朋明妃新曲評漢人憐昭君遠嫁故

歌詩以慰其在馬上之心晉文王諱昭因改作王明妃
歌石崇製曲以教綠珠有曰父子見凌辱對之慙且驚
殺身良不易默默以苟生當時實事實語後人或以此
寓無知己之感也此篇以大節責之凜凜平詞嚴義正
可爲世勸然琴操又云昭君飲藥自殺不從其俗惜花
嘆評世人但有百歲眼枝頭安得經年花十四字可以
鑄鐵宋李二公不能移矣

鄭本立

本立字元道蘭溪人嘉靖二十六年進士官至太僕寺少卿自號東泉居士有斐亭集

金華詩錄 鄭本立滕王閣詩評天地誰容燕雀棲時分宜恣肆憤而爲此言也按行狀分宜家恒設一虛位每監司行部至者率曲意拜之公謂不當徇人以非禮之恭顧令撤之左右失色家人彭孔輩恃勢凌鏢公奴隸視之恬不爲意臨江尹林公潤餘干尹陸公鳳儀皆以正直爲時宰所忌公力薦其賢得選充臺諫以是積忤尋拜南通參實疎抑之也

章 适

适字景南蘭溪人嘉靖二十六年進士除行人

擢禮科給事中

金華詩錄

景南五古步趨王韋得其韻趣

黃尚質

尚質號醒泉餘姚人嘉靖己酉舉人知息縣遷

知景州有青園錄

姚江逸詩

尚質號醒泉嘉靖己酉鄉舉歷官息縣景

州是時越中詩人山陰有陳海樓徐文長上虞有葛公

且姚江則醒泉與楊秘圖詩筒往來風華掩映而醒泉

文長秘圖兼精繪事尤爲時所貴重

吳國倫

國倫字明卿其先嘉興人徙居湖廣興國州嘉靖庚戌進士累官貴州提學副使河南參政有
甌洞正續稿

明詩綜 王敬美云明卿詩多實際語不落於鱗網中
自可弟畜子與又云他人詩多於高處失穩明卿詩多
於穩處藏高

徐中行

中行字子與長興人嘉靖庚戌進士除刑部主
事歷知汀州汝寧府用內計謫官稍遷瑞州判

官累遷至江西左右布政使有青夢館集

明詩綜

子與在西曹與王李結社其贈詩云寂寞漢

魏後乃復挺斯人遂令同心者周旋若一身李答詩遠

云既聞風雅音三嘆又在茲元美亦以藹藹吉士目之

兩浙名賢錄 徐中行字子與長興人詩格高調逸近

體宏麗悲壯讀之神聳

按子與爲人慷慨好施與人請者雖力度不能應
之曰奈何使人有慚色座中賓客常滿於友朋中有
才學者竭力獎引薦書至數十無倦色爲刑部主
事時諸郎李攀龍王世貞交最善而市友謝榛同年
宗臣咸相劇切時稱五子後益以區倫梁有譽又
稱七子楊椒山在獄中行時以橐餽食之間入相慰
藉椒山死喪歸追賻之嚴嵩聞之大怒出知汀州府
繫寇有法民受其德累官至江西右布政明年晉左

理藩府訟盡瘵暴卒無子同官王世懋
自南康往赴之爲經紀其喪歸里焉

胡憲仲

憲仲字文徵海鹽人嘉靖庚戌進士

海鹽縣圖經 文徵游鄭端簡之門博覽今古益留心
經濟在都手鈔烈聖手錄搜覽六曹百司掌故奏議方
乘諸書漸悉概於中見之行事性好吟詩善同年粵東
梁有譽引交吳宗徐諸子來南都益構思苦吟遺疾卒
集三卷行於世

豐坊

坊字存禮坐法竄吳中更名道生字人翁甬東

人嘉靖癸未進士授禮部主事後改南考功主事人稱爲豐考功

風雅閒談 弇州謂考功詩如沙苑馬恣情馳驟中多敗蹶李鄴嗣謂人翁詩步驟極閒深合古法蓋弇州所議者乃其古詩而鄴嗣所許者則近體也如流年兼病長客舍獨春歸靜日無人到春風共我閒酒醒初覺暑天曉細生涼故交驚漸少後進畏相親等句何等閒雅豈可概以狂誕目之

鄭國賓

國賓字汝嘉蘭溪人嘉靖二十九年進士仕至

禮科給事中有卧雲堂集

金華詩錄 抱樸詩酷喜摹古不特用古題者步趨古
意偶一落筆語言意思皆識經緯五七言小詩亦能得
此意今錄其音節高亮如唐人絕句可付旗亭者爲先
生別開生面

姜子羔

子羔字宗孝餘姚人嘉靖癸丑進士除成都府
推官又爲禮部主事終行太僕卿

姚江逸詩 太僕右侍文成講席輒有所契易簣時賦
詩精一爲何物良知亦是閒是豈僅與詩人爭一聯半

句之工者然俊爽之氣涌出於行墨之間亦復不可掩也

陳錫

錫字元之臨海人嘉靖丙辰進士官禮部祠祭司主事有楮癭集

臨海縣志 元之因考察罷歸杜門著書嘗作易原辨陰陽象數之旨証以古今事變識者謂遠過焦氏易林善賦詩卽席分韻數百言刻燭而成

盧仲佃

仲佃字汝田東陽人嘉靖三十五年進士歷官

晉江令刑部主事兵部郎中廣西布政司左遷

兵備惠潮有何莫軒集

金華詩錄 方伯詩七律居多亦最穩觸手稱心得大
自在數章而外如天空忽見雲飛影意遠時聞出谷聲
雲山千里青雙眼烟雨三江白一燈得句每於看竹後
懷人定在月明時高懷五夜蘆花月歸思三秋蘋葉風
風前飯犢橫吹笛雨後臨流亂採蘋萬事飄飄青竹杖
一生瀟灑白雲關滿院鶯花蝴蝶夢隔江雲水鷓鴣聲
酒盃詩卷空湖海蘿月松風自管絃風軟鳥聲過竹細
雨沈苔色上階清牧童飯飽身眠背桑女蠶繅鬢插花

到處斷碑摹鳥篆隨緣僧榻戀鶉居意境俱佳琅琅可
誦

許三省

三省字一所仁和人嘉靖戊午舉人官御史左
遷夔州守

湖墅詩鈔 許一所爲御史巡檢兩淮不取羨餘抵鳳
陽不往謁鎮守璫左遷夔州守時猛虎噬人一所齋戒
檄之三虎斃壇下民建伏虎亭後璫以他事罷官纔年
四十二角巾詩酒無幾微怨心八十六乃終曾孫孝恭
名昭遠喜讀書尚氣節 國初錢塘令顧咸建崑山進

士以節死懸首鎮海樓孝恭力請於貝勒王殮而歸之
士大夫咸高其義且事母孝母歿哀號喪明妻盧氏尤
善事舅姑歸錦橋許鈔術其故居也墓在八角亭南稱
雙孝墓一所於詩祇餘事錄其西溪菴一絕云一灣溪
水綠陰肥獨木橋低露竹扉半掩半開人少到隔溪雲
送老僧歸

沈 銳

銳字時抑號心泉仁和人嘉靖辛酉舉人孫自
成必成

湖墅詩鈔 沈心泉有二巖寺詩云處處名山僧作家

松筠有路卽烟霞奇峯往往石成筍仙洞悠悠梅欲花
古壁仍留唐翰墨老禪猶着晉袈裟我生踪跡江湖半
到此雲房日又斜

盧洪夏

洪夏字思禮東陽人嘉靖甲子舉人署寶應縣
教諭歷滁州守終刑部員外郎有效顰集

金華詩錄 盧洪夏春遊懷蔡文感賦詩評此詩寫重
遊懷蔡之情故題不署遊地詩本和蔡韻初和係秋日
蔡元戎邀遊西華有云蓬徑直從山瘠上鵝田高傍嶺
頭開再和係春日重遊有云澗水縈回當面落山光爛

漫趁人開皆寫西華景色也

吳執御

執御字君駕號朗公黃巖人天啟壬戌進士官
給事中

三台詩錄 給諫諤諤敢言以直節罷歸倪元璐贈詩
頂門一下是陽剛七十諫書飛血光云云骨鯁可想見
矣公以崇禎五年歸里不復出黃石齋怫然曰此何時
而白日高枕耶遂去公間之疾追數十里留與歸不可
乃相與入九峯盤桓數日有唱和詩至今留壁間

盧洪秋

洪秋字思義洪夏弟以從軍功官神柜管參將
有解甲集

金華詩錄 西華詩有雅歌投壺度無一語劍拔弩張
也七言自數篇外如聲名無復龍墀夢瓢笠甘從鷓鴣領
遊行李半肩龍劍泣敝裘一領酒尊寒三峽帆檣隨馬
渡五溪窺夢聽猿消豐獄已收衝斗氣匡廬遙枕落星
灣黃花已醉陶元亮皂帽初裁管幼安風回朔漠無多
雁月照關山幾處樓竹裏禪房閒世界尊前風月舊心
知數詩設色鍊聲居然名雋

陳
贇

贄字惟成餘姚人以薦爲儒學訓導入爲翰林
待詔陞廣東參議終太常少卿有蒙菴集

姚江逸詩 贄致仕投老西湖與騷人墨士爲詩酒之
會評者謂其古選逼陶柳近體鬚乎盛唐

朱樸明

樸明字未詳海鹽人

居易錄 海鹽朱樸明嘉靖時布衣其西村詩雖未脫
臨摹之迹亦有佳句因畧加揀擇以備盛明時一種七
言如數峯蒼翠寺門過三月落花溪水深揀花風過蠶
蛾老麥秀城宜雉子斑千年玉骨湘纍墓萬里堅城少

保家雁來關塞暮天碧龍起江湖秋水腥巫峽曉風鬢
短髻楚江秋水練長裙山圍翠色迷秦駐海送潮頭上
浙江落花時節已寒食流水陂塘還被除白雲出岫淡
如掃紅藕作花香可憐月明蒼壁土繫仙舫風細幔亭流
白雲此例皆佳

趙金

金字淮獻烏程人

靜志居詩話 徵士年六十營菴室歛生平齒牙爪髮
之已脫者洗滌而囊盛之以爲殉葬之具賦全歸詩三
章其一云憶昔髫年時嘗記齒初齟歷歷真牙生蔬食

藉以進邇來筋骨衰齒牙搖且振朝夕學種之種之惟
自慎餘齡已七十疏豁落殆盡萬物有消長死生當委
順其二云十指之爪乃筋之餘搔彼白首藉爾爬梳一
彈指頃歲月其駛時或脫之式用藏只嗟嗟此爪我心
不違他日觀化亦從而歸其三云朝梳暮梳白髮落首
一朝禿盡真成老醜藏諸囊中括之無咎天地一毫惟
我所有人言白髮公首不負我將全歸其言何厚

黃中

中字文卿括蒼人

括蒼彙記 文卿嘉靖中以鄉薦知鉛山縣擢監察御

史陞天津兵備副使錢唐田汝成叙其集括蒼詩派倡
自郁離子郁離子沒凡二百年無聞而有黃西野出焉

李邦樛

邦樛字紫卿縉雲人仕終九江府教授有積石
山房集

處州府志 紫卿嘗賦豆腐爲督學鄒嘉生賞鑿台人
陳函輝素號博物遇邦樛自誦服

李學

學字昭敬東陽人有蛙吹集

金華詩錄

蛙吹集秋後遣懷有句云垂老已無投筆

志明時肯作飯牛歌是其志不在用世也

方堯治

堯治字翁恬蘭溪人太古孫

金華詩錄 翁恬一字六如號元暢詩有乃祖風惜志
乘畧之莫能詳其事蹟讀所作詩有泛舟鸚鵡洲放歌
示同遊諸王孫答西園宗候問疾及武昌武陵岳洲寄
贈諸作大約客於楚府者與吳明卿往來聲氣亦通七
子然所作詩豪氣激越却不盡規撫王李

斯一緒

一緒字惟武東陽人有懷白山房稿

發書 一緒狂名曰著督撫泓陽王公招致之曰生倦
遊吾能爲生治裝亡何以雪中豪許直指疏救并奪職
乃召謂曰吾歸矣無以爲生計奈何因上詩云東海鯨
鯢罷築觀謗書盈篋下長安登壇結客黃金盡蔽闕浮
雲白日寒吳苑霜威清鼠社代山峯煮翠擁鴻翰漢庭封
事多陳迹折檻何勞解豸冠公默然亦答之詩曰山色
入城看湖光暫倚闌主恩新賜罷客路舊愁寬向日開
吟卷呼童理釣竿扁舟吾計就胡海正漫漫爲移書燕
薊鎮兵使者張君使延致一緒一者遂入燕

金華詩錄

西冷比丘止菴云斯君惟武詩余讀一過

畧得其志意之所存蓋身不逢時而豪宕感激之氣拂拂從十指間起至今如將見之如云西園繁桃杏紅綻綠初妍孤松惡其熤晦居攢峯顛又云晏歲景光須自愛繁華多少到今萎又云乾坤六逸留吾輩散髮瀟湘莫住盃揆其志氣有未易受人憐者

李能茂

能茂字允達東陽人亦稱仲達或稱仲子有卑邇亭稿武林倡和集友疴山房集

發書 李詩雄健有作者聲嘗謂人曰吳寧建置千百年今乃一人有半或問一人爲誰曰我又問孰居其半

復張目曰斯一緒然一緒奮意無所附麗賢於能茂遠
矣能茂詩如海嶽心懸孤劍外乾坤業就彩豪多謁
帝星辰天北畔懷人風雪海西頭擊劍長虹流碣石呼
盧明月滿咸陽秦淮鷓首春烟合建業聽前暮雨寒千
花南浦吳娃醉獨樹西陵越客過白眼中原無倒屣青
春故國有加餐諸天風雨開尊斷列郡樓臺入夜封絕
壁天痕開暗谷空江月色散輕濤朔雲鳴雁黃花盡落
日蒼江白髮哀平林夜火漁舟出極浦秋聲雁陣移五
言如天姥雲堆案嚴陵雪照蓬薜荔封蠶章芙蓉溼劍
花駿骨名時重羊腸世路難雨勢蒼江動秋陰大麓長

路通秦望北山斷禹陵西皆雄健有作聲

金華徵獻畧 懷白山人譏世之有意無詞是矣然自
七子之風盛吾婺學者鼓其餘波而浮夸之弊不免國
初淳樸之意寢息然觀其一二零篇鑄詞立格皆有師
匠李仲子筆力雄健倘假以年豈易量以所至

李振聲

振聲字元功東陽人自號石艇子有石艇子詩
集

金華詩錄 村居詩四首注石艇子村居平韻詩三十
首凡三疊極盡村居之勝四章外如近郭霞明紅半角

遠峯雲盡碧千層
面水堂虛收滉漾
向山門側避巉巖
細松遶徑雲常泊
修竹當門風自開
魚躍偶看萍翠底
雁飛長見葉黃初
遠郭樓臺橫縹緲
澄江舟楫散空虛
山形晚缺歸雲擁
徑面晨迷落葉埋
螢宿草中明復滅
鳥飛川上獨還雙
溪東飛雨溪西日
山足流泉山頂雲
摹寫景物皆堪入畫

金華徵獻峒 余閱石艇詩作詩話一篇梧岡歸自粵
見之拜稽首曰先君卽此可傳矣乃錄其畧有曰名高
則謗生遇阨則譏至議論一中人真宰失其恃有曰宋
鑄元祐碑漢與司隸獄浩浩天地間白日沈西陸有曰

文章泄元化富貴焉能及我食僅一蔬我衣僅一襦但
學陶與孟饑寒復何戚有曰壯懷千里志老居四壁家
落日掩柴門收淚對黃花有曰出無濟世謀入無資身
策我歌不足歡我哭不足戚悠悠天地間蚩然無損益
有曰登山採薇蕨臨川拾蘅杜落日漢諸陵秋風動禾
黍有曰易制千行淚難降一片心有曰食梅知酸牙茹
荼知苦口無家逐斷蓬有地餘衰柳有曰群居不碍獨
賞心誰與同靜然天地理取用故不窮有曰海懷泛溟
渤山想涉崑崙有曰登山驅白鹿入海駕青虬先生年
七十自爲輓詩至八十餘合爲一帖曰蒿里吟

吳士瑋

士瑋字潛玉號笨子鄞人諸生

甬上耆舊詩叙傳 吳潛玉士瑋號笨子爲諸生數試
有司不利遂挾其詩客都下足跡遍吳粵豫楚間笨子
負才氣喜與奇人魁士交人亦翕然稱吳生過文江時
鄒南華先生方歸里門笨子上詩有曰到來天地傷多
事歸去江湖尚有人一時誦之鄒先生爲叙其遊草曰
文江詩選客有過予論詩者曰先生甚喜笨子詩何句
最佳余謂笨子詩如身老喚人看國色此語意極佳亦
極可嘆余近來看年少中奇文字自顧衰老不能爲楊

聲輒呼諸名士讀之。坐上有名酒，以病欲飲不得，使吾友盡觴。望高崖峭壁，患氣不能上，促同遊健者造其勝，俱與笨子同此懷也。笨子又曰：寶刀出土懸空壁，老馬隨人看種田。詞意亦極慷慨。余錄笨子荔品詩至十首，其餘奇句甚多，更爲標出。如曰：綉閣分香烏鵲腦，元房劈斧玉蟾蜍。曰：落日呼童取未利，晚風岸幘把琅玕。曰：清過蒲桃應更遠，味超橄欖不須回。曰：眼見春花鷓鴣雨，口甜秋實鷓鴣天。曰：白擎龍女將珠獻，紅戴鷄人賽幘來。曰：美過豹胎難等量，香於鷄舌沒中邊。曰：軍持並解甘泉浸，華蓋重懸佛頂珠。曰：誇道留人多海錯，還將

落句劃江烟曰南面湖中看晝夜東頭菴底語行藏曰
黃颺乍驚雷海笑紅毛未到電邨虛曰燭龍照夜分蛛
織天馬行空驚火流曰髮禿桂花開後見手香橙子剖
前知曰閒情一點松燈照塵念三盃米汁移曰穿河貯
水雲爲帶壘石成山霧作巾此等不可盡舉笨子時年
已六十餘尚奇麗漏出若此聞其有品菊百咏惜未見
之

章敏學

敏學字行甫蘭谿人

金華詩錄 行甫序倪又醇詩云余習聲詩於近代則

知有薛君采之清真王百穀曰唐詩廢於今之七子鄧
遠遊曰吾但不作今人口吻耳豈非以其浮遊之詞汨
吾清真之旨耶余久有味乎其言按此則行甫之詩欲
矯七子之弊主乎清真惜所見不多

章有成

有成字無逸蘭溪人懋曾孫

金華徵獻錄

髯翁別墅曰谿堂濱有巖突起名小赤

壁每風日晴佳邀數友攜樽泛酒有詩曰人今難問舊
衣敝不求新又曰花移難借影琴在可無絃書法鍾太
傅頗厭求索有詩曰君才真國寶臣法匪奴書詩法太

倉厯下而頗歸真淡好獎勵後進或以文就必多方誘掖之

盧光許

光許字盡臣東陽人有猗蘭齋集

金華詩錄 盡臣五言清微淡遠猶存王孟風規

江伯容

伯容字有量蘭谿人有青蘿館集

金華詩錄 吳江孫方伯枝守婺州時造青蘿館與有量談甚契及官浙藩折簡招之不一往方伯重之爲序其集曰取材於選效法於唐五言古之蒼然老於骨也

七言古之沛然雄於勢也五七言律之深於鈞旨巧於
取字也長律之藏於麗也五七言絕之悠然而雋也其
氣不瀉其意不纖而露歌之有聲目之有色按之有力
於盛唐卽不一一方軌而執鞭吾忻慕矣蓋極推重云

李爲森

爲森字君茂東陽人

金華詩錄 君茂有古今宮意百咏今錄其明宮一首
以存大畧其詞云窄袖宮衫珠絡垂葵花小朶巧相宜
烏紗帽蓋紅裙摺行步姍姍識內儀原注女宮衣團領
窄袖刺折枝小葵花加金縷珠絡金帶紅裙烏紗帽飾

以花額綴團珠結壓鬢耳墜亦以珠

倪思古

思古字又醇金華人有嫗解篇

章敏學嫗解篇序 又醇謂余吾酒人耳直喜李遠手
其一編坐卧不釋觴酌方持輒有吟咏亦樂夫老嫗之
能解也余謂又醇機調則李遠寄興則王孟如鏡花水
月玲瓏不可湊泊則嫗之所解至於興象之外忽焉而
神理躍如如雪殘芳草滿平原海上潮生夢欲回碧空
斗轉星朝北水邊春暖開紅藥等句王孟見之而難色
何李遠也詩之不易言者兩端目遇之而成境古今共

之心遇之而成境外之境有獨悟焉則又醉詩之謂也

諸葛鯨

鯨字騰甫蘭谿人蘭皋風雅及明詩綜俱作君騰寄籍酉陽宣慰司爲諸生貢入太學有漫遊雜稿黔中集問華子集

金華詩錄 騰甫詩工於言情當得力於六朝樂府寄籍蜀中偃蹇以老蘭皋風雅出自同里不能詳其爲人可惜也明詩綜選渝城人日簡亭給事一詩云襄陽人又註云一云蘭谿人

諸葛弼 諸葛佐明

弼字夢良佐明字子文俱蘭谿人

金華詩錄 夢良子文皆嘉靖間諸生能詩子文仿樂
天何處難忘酒體作何處更堪詩如試墨書蕉葉煎茶
折竹枝菊香陶令酒蕪長季鷹絲方池流蘊玉疎柳雨
垂絲皆稱好句

方山

湖墅詩鈔 方山采山稿從太倉王弇州點定鴻博徐
大文跋云百年舊蹟真至寶也錄其咏中秋塔燈示諸
文學詩云熠熠浮屠爛法雲祥烟抱月吐氤氳月華三
五秋方半塔影人天界不分珠樹層層懸火齊霞標面

百聚星文千家此夜笙歌沸誰擁青藜照典墳

王嗣奭

嗣奭號于越鄞人領萬歷庚子鄉薦仕爲涪州

知州

浙江通志 于越少有文名及長博覽經史尤嗜少陵
詩嘗夢與把臂共吟後之官入蜀過草堂謁少陵遺像
恍然夢中遂詮註其詩曰杜臆著有左右鏡山中天管
天諸筆記

曹徵庸

徵庸字遠生一字平子平湖人萬歷戊戌進士

辛丑殿試仕終汾州知府有冰雪軒詩集

靜志居詩話 汾州詩品超逸誦之如食哀梨脆棗大
是爽人

田藝衡

藝衡字子秬錢唐人汝成子以歲貢爲休寧教
諭有留青日札

錢塘縣志 田藝衡字子秬汝成子年十歲從其父過
采石賦詩曰白玉樓成招太白青山相對憶青蓮寥寥
采石江頭月曾照仙人宮錦船性不羈任俠多聞好奇
世以比之成都楊慎

吳孺子

孺子字少君金華人嘉隆間以黃冠游吳楚間

有吳少君集

吳少君遺事 自言曾得落葉識心酸一語三年不得
出句後客秦州以衣薄不勝大寒得寒風知絮改足成
之又言我悼李叔承夫人詩自謂平生快作奈以死乳
二韻爲累欲去不忍忽有告余以古詩置之於時快叫
政猶漢得韓信幾坐連駮却賴滕公追留一大豪傑
婆書 少君細雨長江去斜陽孤鳥來石色寒侵戶苔
香細入林群星低草墅孤月迥花宮種藥寒雲外分泉

細靄中青山隔幔小白鳥向人閒
老畏年光改貧隨道
路長日月甘垂老江湖豈用名
客路黃花近鄉心白髮
多落日旋依樹天寒早閉門
臺迥流雲細江清好月遲
細雨釣絲重亂山樵徑微俱
蒼深幽細唐人佳境

文藻按注珂玉珊瑚網法書載吳孺子題頊子京樓
詩云轉覺通路難豈料故人惜假我好樓句愛此春
湖色湖上梅花出短牆一開半落湖水香春陽羞濕
香花細桃花梨花亦不忙君家有酒藏床頭可憐花
開未肯遊願君醉我君亦醉花朝慎勿喚莫愁房櫳
窈窕嬌欲留悞恨歸來纖月流不知此景誰能醉空
將好句爲君投此詩全篇
可以得少君集大槩矣

朱 唐

唐字少欽越人隆慶戊辰進士官至文華殿大

學士贈太保加贈太傅諡文懿有集

海嶼詩話

文懿未嘗以詩名故集中無詩竹垞於館

課中搜輯得薊門行一首真如菖蒲花世不易見者然
白草邊塵暗黃沙塞月昏之句音節鴻朗絕類盛唐蓋
吾越山川秀發雖不善吟咏之人開口自諧風雅

按文懿別墅在塔山下曰小瑯琊有山西老僧寫金剛經一部未竟而病謂侍者曰此經今世不能完俟下世汝持來我當續成之侍者曰吾師來世託生何處曰汝只須問小瑯琊便是我也侍者攜經遍遊各省不得所謂小瑯琊者數年將死囑其徒復覓經守覓至吾紹忽見山巖石刻小瑯琊三字心動因詢里人始知爲朱公別墅求謂馬公展卷笑曰是吾所書也自當了此一段公索留僧於墅數日寫畢命持去僧曰相公卽吾師祖此經存相公處猶存吾寺也遂別子孫藏爲世寶俗稱爲兩世經余友王大山五十

年前猶見之前幅，紙甚舊，近黑，續寫以下，猶新帶微黃，色字畫果如出一人之手，前後無稍異，楷格秀整，頗似二王。

唐邦佐

邦佐字惟良，蘭溪人。隆慶戊辰進士，歷知秦和如皋儀真三縣，入爲刑部主事，謫判兩淮運司。轉贛州通判，遷知光州，有比部集。

徐應亨，唐比部詩序。先生爲比部郎時，與進士鄒爾瞻同舍，郎沈純甫二三君子，以節義文章相砥礪。會江陵遭父憂，不去位，諸臣爭上疏指斥之。先生陰爲草奏，第以母老不署名，疏入江陵，挾上怒，廷杖之。先生與甘

子開諸公實治橐籥又嘗爲咏史詩云明珠不彈雀君子慎內交孟堅何英邁乃爲竇憲招蓬生豈無托麻中故蕭蕭蒼蠅附驥尾肯受蹇驢邀一勒燕然石柱搢焉能逃達哉張仲蔚繞宅生蓬蒿江陵使人徵得之遂欲引繩批根諸不附己者而先生竟以星變謫走

金華詩錄 八句作對老杜時用此格必大氣運之始能化去對仗痕跡此篇對酒可謂合作拗律亦惟杜爲工比部卜居一首外如夜宿錢江云一天月色夜如畫萬戶砧聲秋滿城頗稱健舉

全浙詩話卷三十三終

全浙詩話卷三十四

會稽陶元藻篁村輯

男

廷珍

編次

仁和朱文藻映漣

參訂

同邑宗聖垣芥颿

明

沈一貫

一貫字肩吾號蛟門鄞人隆慶戊辰進士授編修歷官中極殿大學士贈太傅諡文恭

甬上耆舊詩嘉則之詩渾涵博麗吐內古今公才既

與相當而更能出奇於其間嘉則如太山長河而公益以崩崖飛瀑嘉則如茂林修竹而公益以奇松異草故其所造幾青於藍至公一生學問及歷年相業讀其詩輒彷彿見之

趙志皋

志皋字汝邁蘭谿人隆慶戊辰進士第三人歷官少傅兼太子太傅吏部尚書建極殿大學士贈太傅有澱陽詩集四游六虛堂稿

金華詩錄

太傅五律有懷山八咏序云予歸自南粵

築室靈洞山房居二年復應召出山閱十三年於茲南

北遷徙兩過之一二宿卽去松竹尚未茂密今八年所
矣寤寐常在之一日山僧來語余松木之盛可干霄蔽
日棲真禪院亦復崇建四方徒侶踵至鐘磬聲聞山谷
答響猶然西方聖界也予聞言神往六上疏乞歸未允
乃選山之勝八他日可寄跡者藉以自命各賦一首以
寓懷山之意其八題曰棲真居士六虛上人二初牧侶
靈溪漁父紫霞洞叟白雲樵客涌雪寒翁玉露丹仙詩
不具錄存此以備靈洞故事

張元勳

元勳字世臣號東瀛太平人官至太子太保

三台詩錄 東瀛宴罷酬諸文臣詩云幼習干戈未下
惟今朝御宴苦熬髭江南風景人同樂瀛海烟波我獨
悲斷帶接韁牽戰馬擘衣抽線繡旌旗貔貅百萬臨城
日可要諸公一首詩時文臣頗有以公武人賦詩驕公
者故有末二語云云若輩但知咬文嚼字不值公一笑
也

徐桂

桂字茂吳餘姚人隆慶辛未進士仕爲袁州推官

兩浙名賢錄

桂堅正不阿失上官指遂投劾歸居杭

城東隅有亭池竹木之勝亭中列圖史金石遺文瑱羣
鼎諸法書名畫日婆娑其中興至發爲詩歌競響漢魏
六朝間尤長咏物鍛鍊句字無不工著詩文雜稿數十
卷

王 湍

湍字碧山太平人官德州知事

三台詩錄 碧山棄官學道臨海蔡霞山有題碧山晚

隱卷詩云滿眼風波苦海深碧山深處稱幽尋憑誰作
伴消長日濁酒三盃一曲琴可想見高致矣

劉伯淵

伯淵字靜之號念庭慈谿人隆慶辛未進士知
泰興縣遷工部主事歷員外郎中出爲江西按
察副使有灌亭集

靜志居詩話 念庭於隆慶五年釋褐萬歷十六年卽
引疾歸其八十初度自嘲詩云謂我歸田早假令不早
有何好幾人欲歸不得歸黃犬東南添懊惱謂令彈冠
出陶令折腰八十日投閒已道宜休三揣分真成不堪
七及百歲思陵遣御史梁雲構存問念庭猶健步迎於
門外謝恩畢騰觚飛爵了無倦容崇禎十一年事也吳
興有顯者家居以厚幣乞言介壽念庭笑曰七十壽

毋乃太早乎浙東西相傳以爲此佳話云

來三聘

三聘字任卿號熙菴蕭山人萬歷十一年進士
初任黃梅調合肥累陞參政

菊坡詩話 熙菴有咏虞美人花詩頗佳詩云西楚興
亡幾度春故鄉遺跡總成塵山花不解英雄恨獨爲君
王記美人

李應徵

應徵初名衷毅字伯遠嘉興人萬歷癸酉舉人
授臨安教諭遷南京國子博士有青蓮館澄遠

堂偶寄軒藿園寄苔蘚易河梁兩都汗漫遊諸

集

明詩綜 彭子殷云伯遠詩頗挫激昂跌宕飛舞若鞭
赤虬轡蒼螭而上下彩虹碧落之間鍾廣漢云先生早
舉孝廉以才望自高旣艱於一第老就四門博士其詩
取材開寶匠法宏正是時七子之習變爲叫喚公安之
派漸以滯永先生激彼頽波力返正始閎麗悲壯卓然
成家

黃九鼎

九鼎字禹鈞遂昌人萬歷癸酉舉人官陝州守

遂昌縣志

九鼎解職歸愛西湖之勝遂家焉名山異

蹟題咏殆逾尤善於樂府擬古諸體結社湖山與名公

互相倡和督撫劉一焜爲梓湖山百咏七七草行於世

湖山詩選

黃禹鈞孤山林處士詩云烟霞渺孤嶼愛

此小亭孤屹立清淺瀨不與家流俱白雪滿空林寒香

散西湖主人稱逋客獨擅茲一區恥爲桃李顏霜雪凝

肌膚素襟誰可托孤鶴翔雲衢桐江有釣叟星光遠不

殊寒月澄清輝握抱雙明珠緬懷千載人誅茆願卜居

黃之璧

之璧字白仲鄞縣人

全浙詩話

卷十四

五

湖山詩選

黃白仲法相寺理宗慧師詩云寶樹曜北
林素氣蒙沆碭岑壁無炎埃松篁有幽響冷然清心竟
膜拜禮法相斂神絳華下頓覺凌虛上佛似相色空我
以業緣障幻意走毒龍精光滅狂象草木返根蒂定靈
歸密藏願紹勝慧因支提聞梵放

陶允宜

允宜字懋中號蘭亭會稽人萬歷甲戌進士除
刑部主事官至黃州府同知有鏡心堂集

菊坡詩話

余宗蘭亭司馬聰穎絕倫詩筆迴殊凡近
其楚中諸咏深得古人規諷之意如蘄簞云皇都炎熱

逾江湖貴臣催篋如催租民情誰詔州大夫麻城鵝云
近年黃州失耕耨一鵝之肥幾人瘦黃陂葛云進之內
宮傳相誇雲綃霧縠無光華價值減少尺幅加織者十
家逃九家當與白香山繚綾官中等樂府頡頏千古非
李西崖所能及也

胡應麟

應麟字元瑞更字明瑞蘭谿人萬歷丙子舉人
有寓燕還越計偕巖栖卧游兩都蘭陰却鞞華
陽養疴婁江白榆湖上青霞等集合爲少室山
房稟

發書 元瑞才高氣雄其詩鴻鬯瓌麗稍假以年將與日而化元瑞之重以弇州弇州歿入白榆社白榆者在司馬社也司馬歿諸詞客裏糧入婺者踵相接莫敢異同

金華詩錄 元瑞擬古十九首自序云垂髫談藝卽耽嗜東西二京染翰之初送人起云悲風號枯桑吹墮林上月客子將遠行驅車中夜發一時名流賞歎以歷塊期之其好古有由來矣弇州跋其後云離之則虞落節前輩俱所不免合之則虞捧心子鱗微用爲累此言誠爲擬古藥石而於元瑞作則曰惟在更剗鋒巧四字亦

元瑞之鍼砭也

靜志居詩話 長律至百韻已爲繁富矣元美哭于麟乃增益至一百二十元瑞哭元美則更倍之蓋感知己之深不禁長言之也

武林舊聞 胡元瑞亦好使酒一日寓西湖汪太函司馬攜乃弟仲淹來杭王元美伯仲并東南諸名士大會於湖中仲淹已病其詩頗有深思秀句心薄胡之粗豪忽傲然起請弇州曰公奈何遽以詩統傳元瑞此等得登壇姑將置吾輩何地汪王三先生因出倉猝不及答元瑞亦識仲淹氣盛第怒目視時戚元敬少保實借二

汪渡江因同席飲出軟語兩解之胡大怒移罵至目爲
粗人戚驚避促輿度嶺去滿座不歡而罷時人作雜劇
嘲之署題曰胡學究醉開湖心亭戚總兵敗走萬松嶺
云云

魏大中

大中字孔時嘉善人萬歷丙辰進士授行人歷
官吏部都給事中死奄禍贈太常寺卿諡忠節
有藏密齋集

靜志居詩話 忠節骨體之臣然頗留心風雅里人王
屋布衣能詩公見其賦秋蘭作爲之擊節值文會公曰

孰爲賦秋蘭者起而復揖之布衣感公之知公被逮日
徒步送之境外揮淚而別

屠隆

隆字長卿又字緯真鄞人萬歷丁丑進士知潁
上縣調知青浦入爲禮部主事歷郎中有由拳
白榆采真南游諸集

湖山詩選 屠緯真嘗於夏日淨慈寺同虞長儒僧儒
談禪詩云名刹控湖南羣山鬱迴互大雲垂步櫺涼風
吹磬戶天陰塔影沈日落鐘聲暮芙蓉池松栝蔭
廣路莊嚴七寶相颯沓千行樹香臺震旦中居然此淨

土言同素心人永日結良晤披榛覓鶉居人谷捫豹霧
蕭灑烟霞言蕩滌煩囂慮靈明故自超神識日沈痼超
則証三乘沈乃散諸趣大道無升降人情有迷悟朗然
惟一心薰修在大度寶藏空不空圓相住無住煌煌大
摩尼凡聖本同具祇以覆蓋深叅劫不得遇明珠綴衣
領行乞亦何故迷情一朝盡回頭卽其處詰士振金鉶
夢境豁然寤望望映冰壺言言飲甘露窅窅落天壤問茲
會應不數

香祖筆記 予奉使廣西屢見紅鸚鵡又有五色者尤
珍麗姚旅云滇中多紅斑又曰曩宮中有黃鸚鵡屠長

卿詩云一入雕籠奪翠裳羽毛新得染鵝黃此與漢赤雁朱鷺隋宦官劉繼詮獻芙蓉鷗皆異物也

靜志居詩話 陳卧子云緯真詩如衝煩驛舍陳列壺觴頃刻辦就而少堪下筯

青浦紀聞 屠緯真令青浦延接吳越間名士青帘白舫縱浪溇浦問以仙令自許在郎署益放情詩酒罷歸縱覽關塞遨遊吳越七閩間嘯傲賦詩長篇短什信心矢口嘗戲命兩人對案分拈二題各賦百韻咄嗟之間三章並就

按緯真作詩不煩思索一下筆時便如三峽奔流灑翻波湧信集詞人四座戲爲彙虞叔咏松齋李之文

咏芙蓉池各限數百字言笑中須臾卮酒二詩並成
又與客對奕口誦詩文此誦彼書書不逮誦雖子建
七步飛卿八叉何多讓馬故其里中父老傳其飲中
下筆杯飲尚搖歌聲初轉一揮已滿四座盡傾莫問
得傳千載只言取快一朝亦極詞人之豪矣此言可
爲緯真寫生緯真亦自言吾姿敏而意踈姿敏故多
疾給意踈故少精堅亦得失寸心知之語也今所傳
由拳白榆采真南游諸集皆未嘗具草之筆其未行
世詩文名絳雪樓集尚計數十卷先是吳人孫榮祖
挾亂仙稱慧虛子緯真篤信之及疾革猶扶床凝望
幾慧虛應輪迎我悵快而卒得年六十有三生二男
長金樞次玉衡女瑤瑟字湘靈俱能詩金樞娶宛陵
沈氏天生亦有才緯真每詩成輒競相寫和所填樂
府詞立唱之兼被絳竹人謂可方謝太傅家庭笑樂
亦古今佳事也湘靈嫁黃元覽早卒緯真誌其墓刻
集曰留香草如鳥宿人烟暝螢飛竹影深夜露未寒
當七夕秋葵初發
候朝陽皆佳句也

陳泰來

泰來字上交平湖人萬歷丁丑進士除順天府
學教授遷國子博士歷禮部主事進員外謫饒
平典史贈光祿少卿有員嶠集

靜志居詩話

員嶠年十八舉於鄉十九釋褐歸娶賜

內府金花燈籠知平湖事劉柳亭贈以對聯云秋進士
聯春進士大登科後小登科鄉里榮之而公以氣節自
許居太學忤江陵因三王並封面質太倉於朝房又疏
請建儲旣因計典疏救孫鑰謫饒平典史陸辭就道賦
詩有直道不緣三黜改孤忠或受九重知卒時年三十
有六耳謫歸日夢至一山羣仙咸集賦詩云涼風拂拂

白雲收宦海年年幾日休翦紙作臚輕撥刺桃花洞口
笑淹留相與樂甚旁一仙云汝乾陵子也後一年當再
會於此覺而以乾陵子自號踰年而歿

陸可教

可教字敬承蘭谿人萬歷丁丑進士改庶吉士
授編修歷官南京禮部右侍郎贈尚書有陸葵

日集

金華詩錄 葵日詩秀色清韻娟娟自好在玉堂視草
班中雅稱其品

馮夢禎

夢禎字開之秀水人萬歷丁丑進士改庶吉士
除編修終南京國子祭酒有快雪堂集行於世
靜居志詩話 馮公儒雅風流名高三席歸田之後間
娛情聲伎箏歌酒讌望者因目爲神仙中人詩亦不蹈
時習五言能盤硬語尤見意匠經營同譜若沈君典屠
緯真皆不及也

臧懋循

懋循字晉叔長興人萬歷庚辰進士歷官荊州
府教授南京國子監博士有負苞堂集

浙江通志

懋循博聞強識畋漁百氏官南中時與名

人覽六朝遺跡命題分賦或至丙夜忌者遂以沈酒中
之歸輯古詩所唐詩所並爲騷壇大觀

陳三槐

子函輝

三槐字用慶號晉堂臨海人萬歷壬午舉人官
南康丞所著有易詩孝經解台嶺人文志

沐雲詩話 陳三槐爲諸生時作詩云一貧堅士節九
死厲臣心見者恠之笑曰莫非王臣爾烏知草莽志哉
後卒以忠節顯子函輝爲靖江令後贈兵部尚書明末
曾作絕命詞四首其一曰臣年五十有七回頭萬事已
畢徒慙赤手擎天惟見白雲貫日其末云慧業降生文

人此去不留隻字惟將子孝臣忠貽與人間同志

按用慶會爲廣州司李一塵不梁嘗慕海忠介之風鐵面冰心不避權要及遷南康人皆惋惜之

朱國祚

國祚字兆隆秀水人萬歷癸未進士第一除翰林修撰官至戶部尚書兼武英殿大學士太子太保加少傅贈太傅諡文恪有介石齋集

明詩綜 曹潔躬云朱文恪詩尤婉秀軒軒霞舉一無俗塵望而知其品之清也朱朗詣云文恪詩非肉食人語正如冰荷在壑冷香襲人萬歷初詩家陳陳相襲風雅幾於喪矣獨嶺表歐伯楨黎維敬區用儒三君旗幟

一
新劔乃初發時樞李則朱太傅兆隆李博士伯達吳
興則鄭侍御允升皆不沿七子之派近人論詩止推一
程孟陽何也

朱長春

長春字太復烏程人萬歷癸未進士官至刑部
主事有太復文集

靜志居詩話 太復頗類孫太初具宰陽信狀海濱風
土如海暗雲連舍春寒雨近城沙田惟種黍鹵井不通
泉過雨如霑雪無風自落沙白沙風裏下黃日霧中生
薄祿供囊藥齋厨費水錢頗盡其致他如折藕露華白

采菱秋水香悠然西湖曲坐對南屏山高樹晨光動空
山衆響聞麥花來社燕小雨破春泥落日餘高柳空江
起暮鐘酒船晴盡出賽鼓暝猶聞纜外青沙沒燈前獨
樹斜蒼藤緣戶結翠鳥落階飛驛火依沙出春星傍浦
懸孤飛江上鳥半滅雨中山皆秀句也晚學修真鍊形
蓋不得志而有托者也

虞淳熙

淳熙字長孺錢唐人萬歷癸未進士歷官兵部
職方主事主客員外稽勳郎

舊杭州府志

淳熙家貧無書與其弟淳貞字僧孺搜

奇獵祕閉門鈔寫方術陰符靡不通曉已而偕隱南山
回峯山採蓴行藥以終老焉少見知於李攀龍王世貞
賦才奇譎搜抉奇字僻句務不經人弋獲以爲絕出於
時賢頗心折湯顯祖屠隆自詭以寡兀勝之黃汝亨評
其詩文曰宏深微渺應念而作風生雨集排古蕩今斯
善譽者矣子宗瑤宗玳皆有文刻德園集六十篇

盛萬年

萬年字恭伯秀水人萬歷癸未進士仕至雲南
布政司使有拙政編附錄

靜志居詩話

盛公浮湛藩屏數歷有年當其司臬羊

城值倭人入寇躬擐介冑乘城擊破之於錦囊所嘗以
一人攝五監司事案無留牘其還家詩云三黜已甘投
嶺外一帆今喜到家鄉所居梅湖饒有魚稻之利焉

陶望齡

望齡字周望會稽人萬歷己丑會元賜進士第
三授翰林編修歷中允諭德遷國子祭酒卒諡
文簡有水天閣集

明詩綜 黃貞父云陶子詩爲韋爲柳間似長吉

靜志居詩話 周望早年詩格清越超超似神仙中人

按文簡公爲宗伯泗橋公子將誕之夕母夫人夢雙
鶴唳庭而婉遂舉孳子公居長字之曰達次曰迺時

有相士金生來謁宗伯出兩兒視之曰長者貴次者未可知也後迺果不育公官至司成當萬歷丙戌應禮部試被黜主司題其卷曰七藝平平公遂發憤於門牆墻垣俱自書七藝平平四字刻意求警拔以變其初己丑聞中作遂極卓鍊峻嶒以會元自命未發榜前數夕赴正陽門關帝廟卜之旁有人聞其禱語大驚乃華亭董其昌也其文亦以會元自許者索觀公文乃嘆服自謂不如及榜發公果第一董第二

陶夷齡

夷齡字君夷號石梁會稽人萬歷癸卯舉人廣

東肇慶府推官陞山東濟寧州知州

金華詩錄

初至東陽聲望傾動一時學者從之甚眾

稱石梁先生

石梁先生題此詩

龍栢吟

竟自註云栢因

短垣繚繞不盡見其奇詩以告主人庶幾脫其桎梏云

爾香砂見之曰我思古人實獲我心政謂此也因爲廣
之以竟其意畧云世間養馬誰支遁徒愛羽毛失神駿
種樹不解師郭駝多方護惜違天和昨來拜謁神廟前
仰視翠栢俯几筵爲索陶公借佳句悠然會心得深趣
徧語父老須信賢千年神物若爲筌短垣羈束今已矣
撤去樊籠任自然錄此以存一則嘉話

按石梁公原詩有紹興年龍渡江藝祖兒孫始通藉
一枝橫出雙峴間葉葉銀潢漱涓滴又云不知龍去
栢化龍不知栢亡龍化栢知龍栢爲東陽趙氏家祠
中古物香砂卽趙氏裔也又按石梁公爲石簣公胞
兄百寶文譽雖獨盛一時論其腹笥宏深二人殊難
軒輊弟兄俱以先品行後文章相勗切磋砥礪學者
稱爲二陶公與劉宗周善闢發陽明良知之學及宗
周赴台公致書曰願足下安其身而後動易其心而

後言俾天下實受其福若徒矜名節如雕鶚橫秋使人望而生畏此小臣所爲非大臣事也宗周嘆服良久公旣歿宗周率門人哭之私諡曰文覺曹山有放生池在巖巖峭壁之下舟從石洞而進公有摩崖數十字其詞曰刻石如腹虹引其口羣鱗都焉龍以爲首皆題於陶卯泱斯盛壇者曰嘉爽也勒銘詞固古雅書法亦蒼老

鄭明選

明選字侯升歸安人萬歷己丑進士知安仁縣事擢南刑科給事中有鳴缶集

靜志居詩話 侯升先生五言近體全學高達夫七言近體全學杜子美語不求工而句錚字鍊卓然名家是時汪伯玉劉子威馮元成屠緯真輩類寫其警毅而遺

其神明其在西吳徐子與吳峻伯皆然先生之詩遂無人賞激者予故取先生之作特多天下之寶要當與天下共之也

朱燮元

燮元字懋和山陰人萬歷壬辰進士累官兵部尚書兼右都御史總督川湖雲貴加太師有恆

岳遺稿

靜志居詩話 太師儀表豐偉飲啖倍十餘人其蒞湖南川貴土司以盃漿乾肉迎車前相接於道公傾槃倒甕一無餘留衆皆驚嘆曰此天人也相誠不敢出犯歲

既久威望著於西南比之蜀相諸葛云公詩不多作句
如買得勞薪先煮酒不嫌踈鬢也簪花荒徼有誰憐白
髮故園亦自有青山越人至今傳誦之

按賊梟羅乾象欲歸誠効力先浼人致意變元拾之
乾象至潛精疑恐懼變元與飲坦懷相示傾酒數斗
啖炙彘肩一酣然假寐斲鞠如雷不解胄不解刀劍
乾象伏地曰此天人也繼而出自此賊營舉動無不
悉竹垞以天人一語乃土司郊迎見其大啖驚嘆之
言此相傳之誤也變元智勇絕倫驅幹安偉年七十
飲啖猶如少年室無姬媵性介潔仁慈洵屬前明三
百年有數人物劉宗周生平不輕許人惟於變元則
稱其沈毅如魏公忠誠如汾陽練達如文饒廉正
如孝肅而將畧大類趙營平可謂傾倒之至矣

李日華

日華字君實嘉興人萬歷壬辰進士除九江府

推官謫汝州判官轉西華知縣遷南京禮部主
事升尚寶司丞歷太僕少卿有恬致堂集

畫牒 予雨後寓武林昭慶寺懷陸伯成倚醉樓寫此
見意雨後溪聲吼似雷高樓倚醉想銜盃段橋秋色無
多遠只隔蘼蕪綠幾堆

六研齋筆記 項承恩字寵升新安人杭府學生也屢
試不第遂隱西湖岳墳攜一女奴供爨奇醜開小肆雜
置書籍畫卷併盆花竹石索價頗高禾中李日華贈詩
云西湖流水供濯足南屏山色對梳頭月夜酣眠琴作
枕雪朝趺坐絮爲裘盆花巧作千金笑壁畫貲高萬戶

侯何用更尋高士傳先生風格在陵邱後以哭婢成疾而逝卽前之奇醜者人皆笑之

靜志居詩話 太僕恬淡自持居官日淺優游田里以書法名畫自娛家近春波橋爲吳仲圭故居暇寫墨竹兼擅雲山其詩非選非唐別裁風格與王辰玉陳仲醇同派微尚纖艷近家宴集語

讀畫錄 李竹嬾先生畫以意少變北苑而其源則寔出巨然僧梅道人蒼鬱秀潤併極出藍之妙至於題畫諸詩諸跋一語兩語皆妙極形容坡公之後未易得其匹也而最愛其題畫諸絕一絕有一幅佳畫有三數幅

佳畫擇其最愜鄙衷者錄其後題畫霜落蒹葭水國寒
浪花雲影上漁竿畫成未擬人將去茶熟香溫且自看
爲王章甫畫黃葉坡深隱釣舟蓼花瑟瑟水悠悠鷓鴣
睡熟漁翁醉偷取瀟湘一段秋寒江待別圖雲去蘭亭
雁影孤凍痕淅淅上蘼蕪噓呵滴得梅梢雪爲寫江干
待別圖題畫與曹先大黃石堆墻竹掃雲澗深花落去
紛紛讀書聲到樵人耳樹擁風回又不聞題畫小卷江
上孤吟欲暮天一舟橫渡草纖綿柳花飛盡黃鸝啞只
好枝頭聽杜鵑題畫與沈子廣烟中浦淑出復沒霜外
柳枝踈又斜秋色不禁初到眼偶因洗硯立平沙題畫

高子葉扇卜築新開水竹扉日斜烟樹望成圍數聲柔
櫓蒼茫外多是尋僧訪鶴歸題陸間田扇石田茆屋入
雲峯一帶清溪漱玉龍隱者近從王屋至天壇移得小
虬松題畫墨紙與張宵函雪後茆堂護曉寒酒餘呵筆
佐清歡不須更簇閒花草凍柳捎雲已耐看題畫與沈
子廣雨寒松閣恣高眠夢入金陵陟紫烟七十二峯多
忘却聽泉潮紀到開先題畫與沈子廣帳挂元綃烟霧
冥簞波盪灑水涵星碧雲不動高天迴夢繞廬山九疊
屏與沈翠水論繪事因題所畫便面烟沙漠漠夕陽餘
野樹酣霜水溜渠何處秋光閒入夢琵琶亭子對匡廬

畫沈沈明扇秋林薄處見山顛
霜樾烟柯指顧便小作
沙坳容野艇空明留與白鷗天
白描梨花雨香雲淡月
霏微薄薄鉛華淺碧衣却似道
山春宴罷水晶簾下拜
安妃小幅與樵逸山亭放眼入
遙天疊疊春沙萬井烟
鬪草踏青兒女事且教留住賣
花船題畫扇霜柯霧樾
冑寒流上有高人讀易樓釣處
每教雲氣掩不令尋跡
認羊裘題畫楮絹小幅柳淡波
寒春事遲雨晴剛得晒
鷓鴣社回故作閒風調醉手離
岐顛釣絲甲子二月侍
肩公先生泖上阻風米涇寫風
雨維舟卷江店酒香花
正濃午潮初上碧蓮空蓬籠暫
映蕭蕭雨柳外晴霞一

縷紅乙丑三月三日北上伯遠送余至京今舟中無事
爲寫小景雲林興寄轉高孤老木虛亭傍太湖曠朗不
容塵隔斷一痕山影淡如無溪山入夢圖做太癡釣罷
輕舸且薄烟遠山遮盡近留巔不須更怯答簪雨紅樹
低梢好繫船後人之慕先生不得見先生筆墨者讀諸
絕句先生之畫滿四壁矣

山靜居畫論 竹嬾道人畫仗其詩以發妙意可謂夙
世詞客前身畫師畫媵一編超超元箸

樵李詩繫 李太僕日華自記天啟癸亥十二月廿五
夜夢與道者遇談三生事謂過去七生矣乃唐天寶中

詞臣也憶上與玉真妃御浮香閣宣喚李白不至因令
長孫錫代之長孫錫者予也因作上已觀禊詩曰曉岸
曠曠日春山藹藹嵐初逢雕輦出漸覺綺羅團花影鳥
飛散絮練魚觸殘水濱三日宴惟簡麗人看上與妃皆
笑曰不忝作娃兒輩師也其事甚異

無聲詩史 君實之精神別有所注不欲以諸長自見
於世由制科歷任至太僕卿浮湛仕隱家食爲多其於
宦况泊如也嘗自題畫云畫成未擬人將去茶熟香溫
且自看其風調可想矣所著紫桃軒雜綴及畫媵諸編
文雖小品自足供藝林幽賞

陳大有

大有字德讓號雷洞太平人

三台詩錄 德讓爲諸生有聲棄去隱南屏山中以耕
釣爲樂有種竹插雲歸白屋放牛耕雨近青村之句爲
時傳誦遺集李紘序

沈朝煥

朝煥字伯含仁和人萬歷壬辰進士除工部主
事調兵部歷員外郎中終福建參政有泊如齋
集

明時綜 陶周望云伯含詩情務己出格由古造材富

故詞博而工神完故氣和而暢王伯穀云伯含詩才不
爲法所縛不爲調所泥龍君御云伯含使君守靖詩多
溫厚爾雅不露牢騷悱惻不平之氣曹能始云伯含詩
體罔不該而才足以達意不斤斤師古法而不與古背
馳

茅瑞徵

瑞徵字伯符歸安人萬歷辛丑進士仕至南京
光祿寺卿有澹樸齋集

靜志居詩話 瑞徵爲坤從孫家世饒裕耽情吟咏歷
官有廉吏之目壯年卽解組歸自號茗上漁公官職方

白雲言言 卷三十一
時著有象胥錄三大征考詩亦真率自喜

劉宗周

宗周字啟東山陰人萬曆辛丑進士授行人累
遷至太僕少卿引疾歸尋補右通政削籍起順
天府尹再引疾歸起工部左侍郎以左都御史
掌都察院事乙酉六月不食死有葺山詩集

靜志居詩話 吾鄉吳太常磊齋於天啟壬戌登第之
前夢一隱者誦文信國山河破碎風漂絮身世浮沈雨
打萍之句問其姓名曰劉宗周也太常不省時念臺先
生以儀曹郎知貢舉相見驚訝其後交契靡間甲申之

變太常死之逾年先生里居絕粒旬有四日而終遺詩云信國不可爲偷生豈能久

西河詩話 海鹽吳磊齋太常未第時夢一隱者來謁口誦文文山山河破碎風飄絮身世浮沈雨打萍之句詢其名曰我劉宗周也時磊齋尚未知公名心記之及壬戌旣第適劉公以儀曹郎知貢舉見之訝然又二十一年磊齋與公皆後先赴召每相見京邸甚親及癸未公以都掌院見放磊齋始流涕使友道所夢於公公亦訝然次年磊齋由吏曹擢太常殉國死慨然曰吾不可負劉公公後作甲申慟哭記凡十人以磊齋爲首其詩有

云何人後死骨先寒二十年前夢底酸又云分付後來如夢者男兒事業儘多般皆謂此也

柳亭詩話 劉戡山將殉節其壻秦祖軾以書慰之戡

山報其書系以詩曰信國不可爲偷生豈能久止水與壘山只爭死先後若曰袁夏甫時地皆非偶得正而斃焉庶幾全所受蓋答其書意也

按忠端殉國史傳稱其絕粒旬有四日而死張陶菴三不朽贊言其絕食七日以飲水不死後絕水不爨又十三日而終則餓二十日纔死而其家傳言乙酉六月十五日丙寅公聞浙省降遂不食戊辰辭祖廟投郭外水中舟子扶之出會聘書至公答曰國破君亡惟有一死七十餘生業已絕食經旬正有彌留之際敢尚自遷延遺玷名教戊寅有答其婿秦祖軾語自是勺水不入口矣次日口吟絕命辭曰留此旬日

死少存匡濟意決此一朝死了我平生事慷慨與從
容何難亦何易至閏六月八日戊子乃卒是絕粒者
旬日絕飲者旬有三日共二十三也又相傳初絕粒
七日唇焦齒燥口吻俱生瘡公之愛女見而憫之煎
人參汁一甌給公曰我父口乾火起所以如此卽不
飲食曷稍飲水以潤之公吸一口大詈曰汝害我矣
蓋知其非水也將甌推却遂絕口不飲水者又七日
乃終此與旬有四日之說相符而中有悞飲參汁一
事未知孰是其爲從容就義
百折不回苦心則一而已

鍾承砲

承砲字誠齋太平人

三台詩錄 誠齋性篤孝親喪廬墓五年有所需書片
紙繫犬頸達之家一日虎啣犬去號訴於後虎卽釋犬
舍後竹生二笋籜解俱成異文黃巖高令才親謁之山

中從叔鳳城贈詩云白雲蒼樹丹崖北舉口相傳李氏
居千古雲山終不改一時添設偉元廬

許令典

令典字稚則海寧人萬歷丁未進士官至淮安
知府有靈泉羸史集

靜志居詩話 稚則一官不達意薄宦淮揚散髮歸田
陶潛之屋不豐范蠡之舟偏小籃輿竹杖紙帳繩床稚
饒樂趣所云愛官何似愛吾廬也詩取適意無意求工
蓋本於香山擊壤

錢文薦

文薦字仲舉慈谿人萬歷丁未進士知新野官
春二縣入爲工部主事有麗囑樓集

靜志居詩話 仲舉論詩升少陵於堂置之首坐青蓮
次之高岑王孟又次之餘子隅坐侍酒而已自謂吾輩
於此不可不有一坐否則亦須坐兩廡中聆鐘磬管絃
之盛然觀其製作未免懦鈍譬之於樂僅比於柷敔控
搥馬爾故駿顧茂齋謂少陵詩窮後工以爲非是詩至
少陵窮固工不窮亦工也斯言得之

來斯行

斯行字道之號馬湖蕭山人萬歷丁未進士累

官福建布政司

西齋消夏錄 馬湖博洽羣書詩非所長然興會所至
吐屬亦倜儻不羣如周昭王墓云赫赫周宣數中興出
師六月未言頻如何江漢空南紀直至齊桓問水濱詠
虞姬云一夜軍聲盡楚聲重瞳歌闕淚縱橫八千壯士
知何處只有紅顏共死生俱佳

卓爾康

爾康字去病仁和人萬曆壬子舉人有修靜堂
集

靜志居詩話

爾康匡濟之才著書等身詩特其一斑

爾

李衷純

衷純字元白嘉興人萬歷壬子舉人歷官兩淮鹽運使有激楚齋草

明時綜黃貞父云元白詩博通而裁練藻麗而瞻達上溯建安下逮大歷可稱通才

黃尊素

尊素字真長餘姚人萬歷丙辰進士除寧國推官擢山東道御史削籍被逮死詔獄贈太僕寺卿追諡忠端有集

姚江逸詩 管可成字仙客副使稷之子早有才名孫
清簡以女妻之亡而再娶不得意遂棄其家業浪跡江
湖工書法有褚遂良蘭亭平生寶之晚而無家出必銜
袖以行余所住乃其故居壁間有江南第一風流才子
八字劈窠徑數尺見者莫不嘆其天矯嘗與黃忠端同
學忠端寄之詩曰仙踪飄泊遍滄洲想見歸懷百緒愁
繚繞畏途殊自苦消沈壯鬼欲何求應知毛骨生難換
須識乾坤老自休易水歌聲羽徵在寒雲漠漠樹聲秋
又曰知君原自渥洼姿落拓人間作蕩兒四海才名鏗
律呂半生事業負弓箕飄零第宅皆無主囚寄妻孥傍

阿誰我亦泛波滄海客與中偶爲北山移 被害之時
北向再拜以謝君南向再拜以謝親賦詩一章逆賢伏
誅贈太僕寺卿諡忠端再贈兵部左侍郎同郡倪元璐
曰公之讓草欲使賈言失至陸語墮新故可以汗青竹
而爲光鉢黃鉉而不覆也姑蘇楊廷樞曰觀所載獄中
被害日作又送萬元白謁武穆祠諸篇慷慨孤直激而
不傷與太史公之稱小雅者何異每一誦之未嘗不流
涕灼悼感慨欲奮也

沈德符

德符字虎臣一字景倩秀水人萬歷戊午舉人

有清權堂集

靜志居詩話 虎臣孝廉生稟異質日讀一寸書所撰
迹事有左證論無偏黨其詩寧取公安竟陵盡反歷下
瑯琊之弊故多艷字側辭雪颯星碎未免病於才多也

高道素

道素初名斗光字明水一字如晦更字元期嘉
興人萬歷己丑進士官工部主事歷郎中有景
元堂詩集

靜志居詩話 水部才思兼人不以格律自拘古今詩
皆超詣五律尤爲長城

施邦曜

邦曜字爾韜餘姚人萬曆己未進士以工部郎中出守漳州累轉至布政使入爲光祿寺卿通政司使尋被黜再名爲南京通政使擢左副都御史殉國難初諡忠介定諡恭愍

姚江逸志 烈皇殉社稷公在長安門聞之慟哭書曰
慚無半策匡時難惟有一死報君恩遂投繯死僕遽解
之少蘇厲聲曰汝輩安知大義是時賊滿街巷不可返
寓公望門求綸居人皆麾出之乃以砒霜投燒酒飲九
竅血裂而逝諡忠介

按邦曜之殉節竹垞謂其從容自經以詩題案則竟作縊死黎洲謂初以投繯被救繼復求縊不能終仰藥而死與竹垞語不同然黎洲與施爲同鄉後輩其言較爲可徵一死孤忠詩句字面互異此不足深辨張陶庵稱其殉難燕京時貧無葬具官贈左都諡曰忠介與海剛峯相類信然忠介後改諡恭愍